

欽定剿平粵匪方略

欽定勦平粵匪方略卷三百二十三 壬戌年

九月初一日

庚戌

馮子材魁玉奏言句容逆匪分

黨屯踞湯岡一帶往來游竄閏八月十四日副將田宗揚統帶各營進攻行近湯岡有賊卡數座相爲犄角田宗揚等分投攻撲逆黨出巢抵拒把總舒寬文中礮陣亡官兵鼓勇直前當將賊卡二座焚燬二十日總兵文龍德與田宗揚

分兩路進偪湯岡總兵蕭知音等屯紮湯岡中  
路之五舟山尾聯絡策應我軍併力齊進該逆  
驚潰立毀賊卡二座殺賊多名餘匪遁回老巢  
查湯岡爲金陵句容往來門戶賊以全力踞守  
牽掣大兵臣等惟有激勵將士多方搜勦絕其  
奔軼之路陣亡把總舒寬文應請

飭部照例議卹

馮子材魁玉又奏言鎮營將士以餉需缺乏藉口飢疲勢成渙散查二十日之戰都司田鎮武經總兵文龍德派令分帶後哨隨同進剿賊營正得手閒該都司畏葸不前策馬奔避實屬臨陣失機啓不畏法據文龍德稟請懲辦當卽飭令軍前正法以昭炯戒遊擊滕代倫都司李占春二員約束不嚴應請一併摘去頂戴抑臣等

更有請者江南將領積習相沿非嚴定營規不足以收實效相應請

旨申明軍紀此後儻有臨陣退縮未戰先潰之員除都守以下官弁軍前正法外其副將參遊各員可否由臣等一面鎖禁一面請

旨定奪以振委靡而肅紀律奏入

上命議政王軍機大臣傳諭會國藩都興阿李鴻章

馮子材魁玉曰句容逆首糾合匪黨分屯湯岡一帶經馮子材等督飭副將田宗揚等前往攻勦先後轟燬賊卡四座賊衆遁回湯岡老巢以全力踞守希圖牽掣大兵馮子材等務當激勵將士認真兜剿絕其奔軼之路該逆蟻聚句容難保不四出紛擾曾國荃軍營將士病疫曾否就痊著曾國藩察看情形如可出隊卽飭令分道進攻以遏賊勢

江北各州縣最關緊要著都興阿督率水陸各軍  
嚴扼要隘毋令該逆乘隙偷渡前據曾國藩奏稱  
擬令楊岳斌駛赴下游一帶防剿現在該提督是  
否痊愈如下游有警一時未能駛往李鴻章能否  
暫赴鎮防會同都興阿合力剿辦均著曾國藩等  
妥爲豫籌都司田鎮武畏葸不前實屬啓不畏法  
馮子材等將該都司卽在軍前正法辦理尙屬認

眞遊擊滕代倫都司李占春約束不嚴均著照所  
請一併摘去頂戴陣亡把總舒寬文著交部照例  
議卹鎮營將弁兵勇動以餉需缺乏藉口飢疲當  
攻勦喫緊時輒敢不戰而遁必須嚴加整頓以挽  
積習嗣後如有臨陣退縮未戰先潰之員卽著照  
馮子材等所擬都守以下官弁卽在軍前正法副  
將叅遊各員一面鎖禁一面請旨遵行以肅紀律



卽著宣示各營俾知儆惕

初七日丙辰官文嚴樹森奏言大股髮捻竄犯楚

疆閏八月初三日由唐縣迤東直趨棗陽境內  
之張光營楊家塢等處圖撲縣城安襄鄖荆道  
金國琛派總兵彭炳武等率隊迎剿逆衆宵遁  
我軍殲其尾賊百餘人又疾竄隨州之安居涼  
水溝草店等處旁擾京山縣之宋河鎮肆行焚

掠賊蹤飄忽異常誠恐繞竄襄樊後路或窺伺  
德安安陸等郡亟應厚集兵力聚而殲旃臣等  
已先期於省防內調派總兵穆正春統率兵勇  
會合營總花淩阿馬隊馳至德郡防剿杜其北  
竄又調道員梁作楫等統率所部疾趨安陸所  
屬分路雕剿又於水師內調總兵張啟基副將  
丁長春叅將曾紹霖等各督礮船駛赴襄河長

江華潁口潁口等處上下策應一面飛咨多隆  
阿酌度情形迅撥所部來鄂兜剿以期水陸夾  
擊迅掃逆氛奏入

上命議政王軍機大臣傳諭官文嚴樹森曰髮捻各  
逆竄至隨州旁擾京山此股賊匪蹤跡飄忽官文  
等現已調撥兵勇分防德安安陸各境並調水師  
礮船駛赴襄河等處上下策應著卽督飭各路將

士分路堯擊務令就地殲除毋任蔓延他處

初八日丁巳曾國藩奏冒僞忠王由蘇州帶大股

賊匪上援金陵屯踞城南人字橋一帶八月二

十日撲官軍營壘一次金陵將卒多病迄未稍

愈曾貞幹亦抱病未痊殊爲可慮逆首黃汶金

胡鼎汶等大股由東壩撲犯金寶圩鮑超尙在

蕪湖養病宋國永代統其軍由甯國赴援行至

新河莊爲賊所乘官軍小挫退回甯國探聞黃  
汶金等逆將自新河莊犯甯郡之西楊七麻等  
逆將自建平縣撲甯郡之東官軍病者太多統  
將鮑超又不在營張運蘭雖已於十七日帶病  
進城而其部卒亦病莫能興朱品隆於十四日  
移守旌德亦皆爲病所苦防守尙無把握所幸  
左宗棠於前月疊獲大勝蔣益澧於十四日克

復壽昌將來徽州有急或可調蔣益漴就近救  
援楊岳斌鮑超病皆漸愈鮑超擬於二十六七  
日回營其軍縱有疏失尙可徐圖整頓奏入

上命議政王軍機大臣傳諭曾國藩左宗棠曰現在  
天氣漸寒疫氣當已銷盡鮑超楊岳斌等病皆就  
痊覽奏爲之稍慰著曾國藩催令鮑超等回營拊  
循士卒先圖固守俟人馬強壯再議進攻蔣益漴

何日到浙其克復壽昌詳細情形並現在勦辦何處著左宗棠迅速具奏賊勢現在趨重金陵甯國而楚營兵將均爲病所苦左宗棠當設法分兵擣其要隘藉以牽制賊勢嗣後軍情隨時奏聞以慰廑念如徽州有警曾國藩檄調蔣益澧一軍就近兼顧卽著左宗棠飭令速往毋得稍分畛域

初九日  
戊午多隆阿奏言  
臣所部一軍專顧西竄

之賊彼時髮逆陳得才大股竄過浙川廳已踞  
荆子關當於前月二十一二等日將荆子關克  
復臣擬將髮逆陳得才大股剿滅後再由豫東  
一路節節掃蕩現據探報髮逆已竄入湖北隨  
棗一帶勢甚飄忽當令副都統穆圖善等督率  
馬步精壯於二十三二十六等日先後起程馳  
赴光襄相機進取並飭道員金國琛梁作楫等



各率全軍迅赴隨棗併力剿洗臣本擬卽日前  
進因各營兵勇自入關後屢經血戰受傷者竟  
有八百餘名之多兼之患病者有一千五百餘  
人該勇等平日打仗皆係奮不顧身今以傷病  
留後何忍忽然捨去祇得暫候一二日飭令妥  
爲調養一俟稍可就道卽行統帶前進奏入

上命議政王軍機大臣傳諭官文多隆阿曰多隆阿

奏擬將髮逆陳得才剿滅再由豫東埽蕩等語惟  
陝西界連楚豫偏近畿疆今同氛猖獗閭境士民  
切盼該將軍率一旅之師拯之水火多隆阿公忠  
體國自能權衡輕重著卽迅督所部星馳入陝俟  
行抵陝境卽迅速奏聞至髮逆陳得才竄至隨棗  
該將軍已令穆圖善等兵勇馳赴光襄並飭金國  
琛等軍會合併力剿洗自己足敷剿辦昨據官文

等奏現調兵勇赴德安一帶防剿著官文卽飭穆  
圖善等會同金國琛梁作楫等各路兵勇併力兜  
剿痛殲醜類務令楚豫邊境及早肅清俾多隆阿  
於兵勇傷病稍愈後卽可悉銳西趨

同日李鴻章奏言據江蘇藩司曾國荃稟稱疊  
據賊供僞天王尙踞金陵老巢僞忠王已抵丹  
陽九十月間定必合力謀我該藩司營內自夏

秋後疾疫流染每營無病者不過一二成隊難以制賊鮑超軍士疾病相等勢不能遠離甯國且恐爲僞侍王等所牽掣或僞忠王橫截其間與金陵隔絕該藩司深入危地不可孤立無援請會商官文曾國藩奏調多隆阿折回渡江會剿俾軍心有可指望等情查各路探報僞忠王李秀城僞輔王楊輔青僞護王陳坤書等合股

上竄分援金陵甯國僞侍王李侍賢又欲由浙東併力來會蓄謀甚狡適值鮑超曾國荃兩軍病疫繁興之際如曾國荃前敵營盤稍有挫失則太平蕪湖防兵皆單賊可循江邊上竄鮑超一軍恐受圍困實關繫蘇浙皖南江西數省全局現在統計上下游各路兵數皆僅可自立不足分援甯國金陵軍營亦僅可守而不可以戰

必另有大隊援兵方可制賊臣思秦中軍事雖  
急現有勝保督辦可以獨任其事多隆阿忠勇  
智略衆所共推所帶馬步隊皆屬勁旅與鮑超  
曾國荃共事有年深相契洽從前每遇急難常  
相救助伏乞

飭令多隆阿迅速取道河南皖北由和州徑趨金陵  
兩三月閒卽可南渡曾國荃當能堅忍苦守以

待援師臣因事關大局不得不迫切上陳奏入

上命議政王軍機大臣傳諭曾國藩李鴻章左宗棠  
曰多隆阿一軍前因都興阿具奏曾國荃請援各  
情曾諭令官文等籌商第自勝保到陝月餘勦辦  
回匪迄無成效關中重地豈容日久蔓延該將軍  
統率所部入關現在斷難南下且相距較遠非三  
兩月不能馳抵江南僕僕道途緩不濟急殊非善

策昨據曾國藩奏稱蔣益澧已抵浙東攻克壽昌  
徽防有警可以調赴超鮑等業已漸就痊愈回營  
傷或金陵警急則蔣益澧所部萬人或分撥十營  
調往助剿左宗棠統率所部與賊相持於金嚴之  
閒俾賊不得繞由皖南偷援金陵俟圍攻金陵軍  
勢既振仍可卽行調回較爲迅捷此時總以先固  
藩籬爲要俟各營疾病全愈再圖進攻朝廷亦不



遼加督責著曾國藩左宗棠酌量情形妥爲籌商  
江浙脣齒相依該大臣等必能審酌緩急通盤籌  
畫用副委任也

李鴻章又奏言總兵王東華等督帶淮揚師船  
在澱山湖堵剿該處迤西之蘆墟地方有賊匪  
千餘築壘一座並有賊船數十隻攔截河面王  
東華會商署提臣黃翼升往攻閏八月初六日

黃翼升親至澱山湖派參將張元隆等分三路  
直抵蘆墟連開大礮並派小隊登岸抄截立將  
賊壘攻破水陸之賊紛紛敗退我軍追過蘆墟  
數里斃賊不計其數乘勝進剿復將尤家莊一  
帶賊壘踏平遂各收隊回營奏入報

聞

十三日

壬戌

多隆阿奏言

臣

自剿除捻匪後見陝

南一帶已無賊蹤是以安心籌辦髮逆臣原帶之兵共三十營先以十營留防廬郡繼以三營助守西安前於途次又遣散一營現在僅存十六營其中除去傷亡患病者不足六千人若再分撥助剿回匪更難得力查髮逆陳得才一股自竄入楚境後卽在隨棗德安一帶飄忽游弋若不及早殲除必致滋蔓日深不可收拾湖北

存兵無幾臣軍自應先其所急若能仰仗

天威迅將此股翦滅卽行遵

旨統兵入關萬不敢稍存漠視奏入

上命議政王軍機大臣傳諭官文多隆阿曰據多隆  
阿奏髮逆陳得才一股竄入隨棗一帶應先其所  
急將此股髮逆翦滅然後入關剿辦等語多隆阿  
此奏自係未接本月初九等日諭旨之先該將軍

接奉前旨計已星馳赴陝現在行抵何處卽著迅速奏聞陳得才等股竄入楚境後在隨棗德安一帶飄忽無定若不及早殲除必致不可收拾官文節制全楚責無旁貸前據官文等奏調撥兵勇分防德安安陸等處並調水師礮船分投策應該省素多勁旅足敷剿洗仍著官文嚴飭道員金國琛梁作楫等軍奮力殲剿聚而殲旃俾多隆阿悉銳

西趨後路毫無牽掣僞任令豕突狼奔蔓延爲患  
定將督勦不力各員弁從重懲辦

同日駱秉章奏言查川匪郭逆自鶴游坪城口  
廳山境遁入陝西平利一帶該處與湖北竹谿  
連界當卽咨會楚省嚴防該逆於七月竄陷竹  
谿竹山八月折回陝西甄坪廳是竹谿竹山之  
賊卽係郭逆一股至石逆全股屢被我軍截擊

該逆不敢接戰現由綦江敗竄貴州桐梓邊界  
誠如

聖諭何以遞越二千餘里竄至鄖陽且有大江之隔  
斷無任其偷渡自南而北踰越十餘州縣地界  
之理謹將奉

旨飭查緣由據實陳明奏入

上命議政王軍機大臣傳諭略秉章毛鴻賓韓超曰

前因石逆奔竄靡定擾及川湘各邊境疊經諭令該督撫等合兵兜剿現在被川軍截擊不敢接戰由綦江敗竄貴州桐梓邊界逆蹤飄忽勢必此擊彼竄疲我兵力前據毛鴻賓奏石逆由合江竄入仁懷該處東入西秀與楚南之永綏等處毗連派趙福元嚴防綏靖當經諭令毛鴻賓韓超等探蹤剿擊以清積年巨患現由綦江倏至桐梓已有駸



駭下竄之勢著駱秉章仍飭帶兵各員跟蹤追擊  
毛鴻賓嚴飭趙福元等迎頭截剿毋令免脫賊蹤  
已入黔境韓超尤屬責無旁貸著該署撫迅派兵  
勇會合川楚各軍實力攻擊一鼓殲除毋留餘孽  
儘帶兵各員稍分畛域任令紛竄惟該督撫等是  
問

十四日

癸亥

耆齡奏言查遂昌縣爲閩江兩省扼

要之區界連湯溪龍游偏近巨寇臣派知府康國器率領廣勇馳往防守並因秦如虎請假回溫另派總兵周萬遠前往處郡接統其衆現今該總兵將所部兵勇調赴縉雲駐紮會同仙居縉雲民團合力防剿副將曾元福等仍分守松陽宣平以固處溫台三郡門戶近據探報處郡敗匪回竄縉雲武義經仙縉二縣民團連次往

勦互有殺傷該逆雖退踞縉雲永康連界各村  
尙時至縣治游弋意在綴我進攻金華官軍之  
後臣現飭林文察統率各營卽自縉雲武義節  
節勦洗進徧湯溪之南並飭康國器率領廣勇  
進徧湯溪之西以期力拔堅城卽可聯絡浙師  
進規金郡至溫處二郡各屬民團屢經助勦洵  
爲敵愾同仇惟籌餉維艱未能裹糧遠出現飭

確查收復郡縣城池最爲出力紳民覈實保獎  
以勵衆心甯波官兵民團自收復餘姚縣城後  
現在籌餉添兵進攻上虞臣仍督飭該郡文武  
各員統率兵勇由上虞一帶步步進剿與衢處  
大兵遙相策應俾易得手閩省邊防福甯府各  
屬團練已有成效仍責成該知府實力遵辦用  
固疆圉建甯府屬亦已飭地方官一律辦團巡

防藉補兵力之不足奏入

上命議政王軍機大臣傳諭耆齡曰處郡收復後敗  
匪回竄縉雲永康時至縣治遊弋意在綴我進攻  
金華官軍之後耆齡現調林文察統率各營進徧  
湯溪之南康國器率領廣勇進徧湯溪之西以期  
力拔堅城聯絡浙師進規金郡著嚴飭林文察整  
軍前進由縉雲武義一帶節節剿洗期與康國器

之師合力夾擊迅拔湯溪縣城以期會合左宗棠  
之軍夾攻金華毋得再事遷延致該匪四出紛擾  
疲我兵力秦如虎受傷調理近日曾否痊愈林文  
察打仗頗能奮勇慶端固守閩疆廓清溫處秦如  
虎林文察之力居多耆齡務當妥爲駕馭加意拊  
循斷不可豫存成見謂閩軍皆不足恃致令得力  
將士向隅也甯波官兵民團不甚得力耆齡擬督

飭文武員弁由上虞一帶步步進剿以分賊勢卽  
著妥籌辦理

十五日甲子官文嚴樹森奏言大股髮捻於閏八

月初五夜閒由棗陽縣城外潛遁竄入隨州之  
安居涼水溝署知州馬元驥督團往剿該逆遂  
由閒道於初七日闌入州城分爲兩股一至京  
山之宋河一至德安應山邊境其竄京山一股

行甚剽疾十五日至該縣之扶兒嶺署知縣張  
慶雲督團迎勦頗有斬擒該逆分股四五千入  
竄及近城地方張慶雲督勇往援賊衆奪門而  
入以致失守分股擾及天門之阜市十八日至  
應城縣之景家墩署知縣景匯帶團迎勦受傷  
墮馬賊遂突竄入城擾及長江埠一帶其竄應  
山一股於十六日至關前署知縣恩榮集團迎



勦雖有斬獲而山徑叢雜此勦彼竄十九日竄  
至該縣之廣水驛勢將下擾德安府迤北附城  
之大花店地方已有賊蹤郡城萬分喫緊黃陂  
孝感黃安麻城同時震動臣等現調總兵穆正  
春統帶所部馬步會合護軍統領舒保及營總  
花凌阿馬隊由雲夢馳赴應城向西進勦道員  
梁作楫督帶各營由襄樊馳赴安陸會合堵截

道員歐陽正堦一軍由豫省回防德安府城及  
孝感之小河司以遏應山股匪下竄之路並調  
派水師礮船責成總兵張啟基等分赴襄河潁  
河各處上下策應惟應山股匪無兵往勦萬不  
獲已祇得將副將周鳳山進攻陡溝一軍飛檄  
調回繞由廣水截擊第鄂省關繫東南大局臣  
等籌畫再三若無一枝勁旅分途雕勦不能痛

加懲創目下多隆阿駐軍荊子關商南賊已回  
竄河南軍情較之鄂省亦覺稍鬆正宜將多隆  
阿一軍移調回援暫駐襄陽居中調度在鄂省  
得此重兵可冀廓清全境兼能顧及豫疆於皖  
於吳亦可收曲突徙薪之效相應籲懇

天恩飭下多隆阿督率全部星馳回援以顧楚疆將  
來事竣後駐豫駐楚抑或下顧金陵再行斟酌

情形妥籌辦理臣等現已飛咨多隆阿剋期督兵回援合併陳明

官文嚴樹森又奏言京山之賊攻陷應城後擾及長江埠一帶並盤踞天門之阜市等處閏八月十八日經水師副將丁長春開礮轟擊賊始遁去總兵穆正春督隊由雲夢進剿先飭驍鐵營馬隊於十八日自德安起程駐紮楊家河距

應城縣三十餘里遊擊擺似龍等會合營總花  
凌阿馬隊於十九日馳往擊勦該逆列隊拒敵  
我軍奮勇衝突斃賊數百名賊敗入城穆正春  
於二十日行抵楊家河二十三日派擺似龍等  
會同花凌阿等督馬隊先進自帶都司蔡正清  
等率所部繼進由黃江口過河行抵距城三里  
許該逆排隊迎拒我軍兩路包抄馬隊斃賊甚

多步軍亦同時並進水師丁長春督率礮船在沿河上下轟擊馬隊復左右衝突直入賊隊逆衆四散潰奔穆正春花凌阿親督馬步各軍追至縣西門外該逆繞城向西而逸城內踞賊先已西走官軍追殺三十餘里立將應山縣城收復共殺賊一千餘名生擒三十餘名該逆敗後麕集天門之阜市一帶穆正春乘勝追襲賊遂

遁入京山界內現飭穆正春會督馬步全軍卽由阜市進剿總兵彭炳武統率各營馳抵安陸會同截擊應山股匪盤踞廣水驛下竄孝感縣之小河司花園一帶護軍統領舒保督隊往援二十五日行抵該縣城內與署知縣韓體震副都統德克登額登陴守禦二十六日賊由花園猛撲縣城舒保督帶馬隊開南門奮力擊殺水

師參將曾紹霖亦於河岸開礮轟擊賊勢稍卻  
詎後隊馬步賊衆由北城缺口闖入韓體震與  
德克登額堵禦不及率勇巷戰因衆寡不敵同  
時陣歿舒保聞報督率直隸州知州伍繼勛等  
飛馳入城曾紹霖亦督水師礮勇登岸助勦鏖  
戰兩時之久傷斃悍賊多名該逆卽時奔潰出  
城我軍乘勢掩擊窮追三十餘里殺賊二百餘



名生擒三十餘名縣城幸未失陷該逆現仍回  
踞小河司二十七日副將藍斯明由廬州馳抵  
黃陂現飭駐紮該縣之八里汊相機進剿扼其  
下竄並飭撫標親兵兩營會合舒保及營總德  
隆阿等馬隊隨時策應聯絡道員歐陽正墉一  
軍併力剿辦查孝黃一路南達武漢東通安麻  
雖沿江上下分布礮船嚴密防堵若無陸師夾

輔其閒亦恐難於施展現已抽派撫標親軍三營駐紮省城輔以督撫兩標營兵分道設防以資鎮定再撥督標一營赴黃州助守並咨明兩江督臣曾國藩署安徽撫臣唐訓方慎密戒備毋使竄突至副都統德克登額署孝感縣知縣韓體震督勇巷戰力竭陣亡深堪矜憫相應請旨將德克登額從優照都統例議卹韓體震從優照

知府例議卹並准於死事地方及各該旗籍建立專祠以慰忠魂奏入

上命議政王軍機大臣傳諭官文嚴樹森毛鴻賓曰髮捻竄陷隨州分爲兩股一股攻陷京山應城一股由應山下擾德安府迤北一帶地方黃陂孝感黃安麻城等處同時震動官文等現經續調總兵穆正春等分赴應城安陸德安孝感等處堵截並

調派水師分赴襄滙各河策應周鳳山一軍亦經  
調回截擊應山之賊並咨行多隆阿剋期督兵回  
援鄂省第該將軍業已起程赴陝勢難令其折回  
楚省往返奔馳曠廢時日致陝楚軍務兩皆耽延  
多隆阿前派穆圖善一軍赴鄂援剿不妨暫留楚  
省俟鄂省情形稍鬆再由官文等飭令赴陝歸併  
多隆阿軍營至鄂省尙有李續燾一軍可由豫省

調回截剿先顧本省儻再不敷分撥官文等當於  
楚南兵勇酌量檄調令其迅速赴援並著毛鴻賓  
趕緊將楚南勁旅挑選數千名遴派得力鎮將管  
帶剋日馳援鄂省官文等惟當將所調穆正春等  
各路之軍飛催前進就現有兵力嚴密堵剿毋任  
賊匪南窺省垣東竄皖境續據官文等馳奏攻克  
應城賊匪竄陷孝感立時擊退情形賊蹤飄忽靡

定意在由楚回皖歸併金陵該督等現飭舒保等  
馬隊並副將藍斯明等軍併力合剿卽著督令該  
將士等扼要截擊務令就地殲除勿令回竄皖境  
黃安麻城一帶陸路空虛固應嚴防武漢黃三郡  
沿江一帶水路尤應扼守漢口至黃州一路商民  
船隻均須先期提歸南岸毋令賊匪擄掠縱橫江  
面致剿辦益形費手

上諭內閣曰髮捻竄踞應城總兵穆正春督隊進剿  
當將縣城收復其應山股匪下竄孝感猛撲縣城  
山北城缺口闖入副都統德克登額知縣韓體震  
率勇巷戰身受重傷同時陣亡護軍統領舒保督  
同將弁飛馳入城參將會紹霖亦督水師礮勇登  
岸殺入傷斃悍賊多名該逆卽時奔潰出城副都  
統德克登額署孝感縣知縣韓體震均因力竭捐

軀深堪憫惻德克登額著從優照都統例議卹韓  
體震著從優照知府例議卹並准其在死事地方  
及各該員旗籍建立專祠

同日都興阿奏冒據曾國荃函稱逆賊大股各  
路麕集橫列五六十里偪濠築壘分股撲犯雖  
經各營擊退無如逆勢甚衆軍中病勇太多已  
穩守半月過形勞苦請分撥兵勇二千趕緊過



江由大勝關前來助剿又據曾國荃函稱身受  
洋槍子傷幸不甚重尙可照料等語因思楚軍  
爲全局所關不能不設法抽撥兵勇趕緊赴援  
先穩軍心當派遊擊楊心純等督率楚勝勇及  
仁勇智勇等五營由儀徵六合浦口江浦繞道  
前進渡江援剿另派副將刁經明約束兵勇護  
送前往於初七日起程再刻下南岸賊氛蠢動

江防極爲喫重前經吳全美親往下游節節布置以杜逆匪紛竄並查拏勾通賊匪之游兵撤勇隨時懲辦吳全美黃彬於上游江面布置妥協後又下駛沿江要隘派船梭巡務臻周密現幸揚防各營疫氣已輕兵勇漸多痊愈當不致有疏虞

同日袁甲三奏言據李世忠疊次咨稱該提督

頻年征戰身受多傷目下傷病齊發懇請代爲  
奏辭幫辦並開提督本缺俾資調養其豫勝營  
全軍由該提督另選一人接統等情臣查該提  
督傷病俱發係屬實情惟滁軍進攻九狀洲分  
兵駐紮龍潭石埠橋扼南北之衝該提督受

恩優渥自應力疾支持勉圖報效當勸延醫調治聯  
絡水師迅克要隘會擣金陵且該提督熟諳兵

機忠勇有謀統帶不下數萬人一時亦乏人接  
手並聞九浹洲之賊於閏八月二十四日突犯  
副將李顯安營盤雖經該副將擊退難保不去  
而復來僞護王陳坤書糾領大股竄撲甯國欲  
以牽掣楚軍僞忠王李秀城亦抵金陵會合城  
賊麇集南門城外狡焉思逞是江南正當喫緊  
自應合力夾攻未便驟易生手現在李世忠一

軍奉

旨歸曾國藩節制屢經該大臣籌給軍裝糧米曾國藩於用兵用人之道頗有權衡雖據李世忠疊次懇請代奏臣究未經允許亦未敢壅於

上聞均奏入

上命議政王軍機大臣傳諭曾國藩袁甲三都興阿左宗棠曰江南逆賊各路趨救金陵曾國荃以孤

軍深入南望時深慮念茲據都興阿奏曾國荃各營屢爲大股逆賊撲犯雖經當時擊退而軍中病疫者多業經穩守半月兵勇過形勞苦疊次飛檄請援都興阿當派遊擊楊心純督帶湖南兵及仁智等勇五營由儀六繞道渡江援剿其江防下游吳全美黃彬親歷梭巡所辦尙屬周妥曾國荃身受槍傷雖據稱尙可照料然自此當倍加慎重以

期穩固軍心著曾國藩飭令該藩司督率所部與  
揚防撥援之軍合力固守務立不敗之地使賊技  
無所施江北各營疫氣漸銷江南亦可漸減仍恐  
諸軍新病之餘尙嫌單弱卽著曾國藩檄催蔣益  
澧之軍分撥前來以厚兵力如一時未能分撥卽  
著左宗棠飭令蔣益澧等兵力攻金華進取杭州  
以分江南賊勢曾國藩左宗棠諒均能酌量緩急

以籌萬全也袁甲三奏李世忠傷病舉發呈懇開  
缺自係實在情形惟滁軍進攻九洲及分兵駐  
紮龍潭石埠橋均極緊要並據稱九洲賊突犯  
副將李顯安營盤雖經擊退難保不去而復來僞  
護王陳坤書等糾領大股圖援金陵李世忠所部  
分紮南岸人數不少且天長六合等處均係該提  
督之軍駐守非但不能遽撤卽由該提督另舉一



人接統其衆亦恐非宜李世忠本係幫辦軍務大員材武甚屬可用且屢立戰功忠義奮發茲金陵戰守緊要之時該提督正當奮勉圖功豈得以傷病遽思引去前經降旨將李世忠一軍歸曾國藩節制該大臣於該提督性情才略均極深悉著卽傳諭李世忠令其迅簡精銳數千馳赴曾國荃軍營幫同擊剿藉資臂助據官文等奏賊竄應城官

軍攻克復經關入孝感縣城雖當時擊走而賊尙  
蔓擾黃孝一帶該處陸通黃麻水通武漢尤恐其  
復窺皖境英霍一帶並由江路順流而下圖犯安  
慶均爲可慮著曾國藩於後路水陸等處妥爲豫  
防並知照唐訓方於皖省各軍豫爲調度毋失機  
宜

十七日

丙寅

沈葆楨奏言准督臣曾國藩咨稱大

股賊匪由東壩竄新河莊東門渡一帶提督鮑超正在移防該處因營壘未定爲賊所乘連峯字兩營一併退回甯國皖南軍情萬緊應檄九江鎮挑兵六百名督赴湖口嚴防等語查該逆如果沿江西竄則湖口九江同時震動且探聞豫匪蔓延楚界連陷郡縣上游下駛一葦可杭九江存城兵僅盈千無從分撥該護鎮亦未便

久離要郡此外別無一兵可調祇得將留省教練之銅鼓等營兵一千一百餘名委都司王定國帶赴湖口駐守惟是隘口林立旣不能路路設防腹地空虛更無從處處兼顧非有一大枝遊擊之師隨賊所向與之相持則彼乘隙而來前途各防幾同虛設現已飭令參將韓進春馳赴原籍興國精募勁卒五千以備折衝顧增兵

必須增餉論江省目前情形不特無款可籌卽  
原設防軍亦積欠至八九箇月不等合無仰懇  
天恩准將江西本年漕折提解京皖兩餉暫行停止  
以供本省之用奏入

上命議政王軍機大臣傳諭曾國藩左宗棠沈葆楨  
曰金陵援賊由東壩竄新河莊東門渡一帶鮑超  
所統各營退回甯國皖南軍情萬緊豫匪蔓延楚

界上游下駛一葦可杭非有精銳之師與之相持  
則乘隙而來各防幾同虛設沈葆楨現飭參將韓  
進春赴興國募勇五千名自應如此辦理惟所奏  
本年漕折提解銀兩關繫京皖各餉全行停止勢  
有難行現在江省情形急迫准其悉數提充本省  
軍餉俟防務稍鬆仍應酌量分撥金陵大營苦守  
待援甯國又復喫緊鮑超之病是否痊愈會國基

受傷是否平復頗深慮念揆度賊情北犯楚境南則圖竄江西均欲斷曾國藩左宗棠等軍之上游且以阻其餉源計甚狡毒疊諭酌調蔣益澧所部十營馳赴金陵未審曾否酌調儻微防有警仍須調撥蔣益澧之師則左宗棠軍營兵力又單前據耆齡奏稱擬調林文察所部六千赴龍游以助浙軍此時閩省防務較鬆兵力較厚該總兵素稱得

力距左宗棠大營近在咫尺僞蔣益禮之師分赴  
各處卽著該撫檄調林文察所部藉資攻剿沿江  
上下竭將士年餘苦戰之力克復數十州縣曾國  
藩等務當先保已成之功再圖進取各營現在疾  
疫情形並著隨時詳細具奏